

A UDIN E A COLORÊTCunvigne
pai 500 agns
de Crudel
zobia grassa

Dai 12 ai 14 di Mai a Udin e a Colorêt si tignarà la cunvigne internazionâl di studis *Rivolte e ribellismo tra medioevo ed eta moderna. A cinquecento anni dalla Crudel zobia grassa» di Udine*. La iniziative, promovude de Universitât dal Friûl in parie cui ateneus di Vignesie e di Koper/Cjaldistrie dentri dal Proget Interreg Italie-Slovenie, al tire dentri diviers studiôs talians, slovens, francês e dai Stâts Unîts.

La rivolte dal Carnavâl dal 1511 a Udin e je un câs esemplâr, che al rapresente chês formis di savoltament sociâl e di crichis tra fameis di nobii che si vevin te Europe dal Rinassiment. Se si partîs dal studi e di une gnove interpretazion di chei fats di cincent agns indaûr, si pues meti adun un sisteme di confront biel larc che al permet di scuvierzi cetancj aspîets de societât furlane e des societâts europeanis di une volte.

La cunvigne e previôt vincjcuatri intervents dividûts in cuatri sessions: lis trasformazions istituzionâls e economicis tra il Cuatri e il Cincent; i scuintris di fazion e il clientelism tra la nobiltât e il popul; il lengaç e la auto-rapresentazion des rivoltis; lis istituzions comunitariis e la ribelion popolâr.

La cunvigne si vierzarà joibe ai 12 di Mai aes 3 daspomisdi tal Salon dal Parlament in Cjistiel a Udin. A fevelaran doi dai plui grancj esperts de *Crudel zobia grassa*: Furio Bianco de Universitât dal Friûl – la gnove edizion dal so studi su chescj argomenti e je pene vignude fûr – e Edward Muir de Northwestern University, autôr dal libri *Il sangue s'infuria e ribolle. La vendetta nel Friuli del rinascimento*, che al è stât voltât par talian. Il Cjistiel di Colorêt al darà acet ae seconde e ae tierce session te zornade di vîners ai 13 di Mai; la cunvigne si sierarà a Udin sabide ai 14 te Sale Gusmani (palaç Antonini) de Universitât dal Friûl.

©RIPRODUZIONE RISERVATA